

## ‘Nei ka noho’

Nei ka noho i roto Pātea, i runga Rangitāwhi  
Ka puta te whakahau me whiu ko te poi  
Hei whakahari ake i te iwi Pākehā  
Nāna nei i takahi te Tiriti o Waitangi  
Ka maringi ngā toto te pakanga o Waitara  
Ka kātoro te ahi ka huri i te motu  
Ka murua te whenua ka iri te raupatu e ii.  
Ka puta te ōati a Tītokowaru  
Ka ara te pakanga i Te Ngutu-o-te-Manu  
Ka mate i reira ko ngā toa tauā  
Ko ia ko Manurau me āna hōia  
I runga o Turuturu, i roto o Tawhiti  
I Papati Hakehake i runga o Kōtuku  
I Taurangaika i roto Waitōtara e ii.

**Kaea:** He aha tā koutou e hine mā e whakaaro nā?

**Katoa:** Hau. Kei te whakaaro rā mātou ki te hoki ki te riu o Pātea.

Ka hoki te Pakakohi ki te riu o Pātea  
Ka tū te haki mā he whakawai na Pūtu  
Ka mau i reira ko te tini o te iwi  
Utaina atu ana ki runga ia te Tāti  
Ka tere moananui atu ngā waka uta kei Ōtākou  
Ka tū te rīpeka mahi nui mo ngā tau e toru  
Matemate ki reira te tini o Ruanui  
Ka hora te marino maungārongo e ii.